

四庫全書

集部

欽定四庫全書

集部

整卷存稿卷三

四

詳校官監察御史_臣龔駘文

中書_臣劉源溥覆勘

總校官庶吉士_臣倉聖脉

校對官中書_臣王鍾泰

謄錄監生_臣畢所誦

欽定四庫全書

整庵存稿卷三

明 羅欽順 撰

序 一十五首

送岑德充歸瓊山序

瓊山岑德充弘治乙卯以詩經領廣東鄉薦今年上春
官不第卒業成均得告將南歸展省太史蔣先生敬之
屬余贈之言先生與余皆故少保丘文莊公門人而德
充公子壻也推敬愛公之意以及吾德充其贈言也固

宜然先生受公之知尤深而與德充游且久先生有言
德充無弗信也而臨別之贈顧以屬我豈以余言為能
新德充之聽也哉且文莊公文學行誼師表當時高風
遠韻漸被來世德充早以美材處貳室誠親熏而炙之
計其所得殆非他及門者可比固將駸駸於高大而為
爵祿功名所迫逐而不置又奚取於余言哉況余雖心
厚德充然從游之日淺其深言之歟鄙鈍之質不足以
自徵其淺言之歟又非先生所以見屬之意也余將何

以為言哉雖然言惟其當不必自其口出可也曾子有言尊其所聞則高明矣行其所知則光大矣德充平日之所聞知不於其師則於其友於其淺者固有所不屑於其深者必無所不至也顧所以尊而行之者果何如耶歸矣懋哉必其所立有在於爵祿功名之外而後無負乎師友淵源之懿且有以為之光矣

送大尹胡君濟時還任錢塘序

邑附會府半天下之途所由使輶日往來如織加以習

俗傾險又多靡麗可欲之玩能使人目眩而志移為令
於此不亟不徐不震不動期月而聲譽起三年而事功
成書所謂有猷有為有守者此其人也乃今於錢塘令
胡君濟時見之夫猷為所以應務也操守所以立本也
三者皆為政所急其或此長彼短鮮不僨事而厲民必
兼有之乃可貴也然非知道之君子其能兼是三者幾
希何哉蓋必窮事物之理通古今之變然後可以擴充
其猷為必明義利之分秉固窮之節然後可以堅定其

操守此君子所以貴乎博學而尚志也學不出乎記誦
詞章之外則於應務宜有所不周志不離乎富貴利達
之間則於立本宜有所不屑是何望其能有以自見於
世也哉如吾濟時其可為君子人已蓋觀於其政而知
其學為有用也濟時比以其績來獻天官書上考循例
還之錢塘鄉郡諸大夫士請余言以贈夫贈者有所增
益之謂也濟時以名進士出宰大邑甫及三年而功效
已焯焯如此吾方歆羨之不暇何增益之能為雖然蓋

嘗聞聖賢之訓矣曰仕而優則學曰官急於宦成茲亦
濟時之所共聞也夫仕優而學不厭者所以為後日之
資宦成而志不急者所以保前日之美濟時方將乘堅
策肥以翱翔萬里得無加之意乎尚克紹厥聞以勸以
戒而勿忽焉夫何遠之不到也家弟允迪守官於杭得
朝夕繼見幸以茲言相與切磋之

贈太守張公之任吉安序

夫分符佩印有數百里之地而君之所以正不正齊不

齊俾四民安其居庶事得其理趨走之吏固不祇率厥
職以交贊其成功感化固繫於躬行抑亦仰視朝廷福
威予奪之權以為進退推移之用也雖然權以濟務常
戒於下移躬行以立本必始於慎獨二者固常相須未
有本亂而末治者或者於隱微之地檢律稍踈以為無
足深慮曾不知姦人之陰圖密伺常思投閒以逞也其
謀幸而一遂則吾福威予奪之用殆不能無所齟齬由
是四分五裂弊端百出乃不得已而甘為一切苟簡姑

息之治是以政多龐雜而民有不勝其病者焉嗚呼焉
有仁人在位而可以病民也今年七月錢塘張公孟端
由前青州太守起復改任吉安吉安江右劇郡也領邑
惟九民戶多至數十萬財賦之入往往倍於鄰封朝廷
不輕以授人亦明矣乃今以授之公欽順聞諸縉紳之
知公者謂公篤學好古於世味淡然顧嘗慨然有濟時
利物之志又謂公青州之政公平縝密民懷其惠更畏
其威雖已去位而人猶思之卓然今之良守也噫公之

名實見推於縉紳者如此信乎賢遠於人然則銓曹之所薦聞天子之所簡命其果不輕也哉今也往蒞吾邦邦人士女方日徯朱幡皂蓋於螺川鷺渚之濱振久斁之頹綱昭躬行之實德福威予奪風行草偃使善者有所恃而益勤惡者有所畏而不敢為厥有恫瘝一朝脫去而免於呻吟愁嘆之苦不於公有望乎凡朝紳之吉產者亦皆以是望公於其行也俾欽順引而伸之以為公贈欽順不敏固知公之優於是也而復效其愚見者

豈謂果能有所增益於高明也哉

送通判劉君復任杭郡序

杭為浙江三司理所中官郎御史銜王命懷公牒以蒞
事於浙省往往建牙分司於杭故杭之務視浙中諸郡
為獨繁守倅恒日不暇給且其勢無專決之便而所見
又多難合之情彌綸稍踈則四面之責交至蓋其難為
如此而吾郡劉君兆文倅杭獨以勤慎詳敏著名會詔
有司舉下僚才行卓異堪任京職者浙藩遂以君應詔

詔初下時吾郡士夫嘗相與物色下僚中求吾郡人之
可舉者得兆文皆曰試以觀舉者之得失既而藩司薦
章至果兆文也則又相與言曰古所謂公無私者其諸
兆文今日之舉乎方日俟其升于王朝而兆文適以三
年之績來獻吏部考其績果最然未遽陟也復還之杭
夫陟明以三考固唐虞之法然當其時未必固執常法
以待天下非常之士也蓋所謂神而明之存乎其人自
崔裴率意改為以人徇法而抑揚高下漸失其序其流

弊至於今未除也雖有豪傑之資負挾器能一沈下僚
卒無以自振使其英華果銳之氣恒消沮於簿書期會
奔走迎送之間是可惜也以此而望庶事修天下治豈
不難哉今天子勵精圖治深惟變通之宜明詔一下有
志之士無不競勸而權衡人物者方將破常格拔奇才
布列庶位以仰承德意然則兆文雖未遽陟吾固知其
不久淹於杭也雖然在吾黨自處顧當以高下遲速置
之意度中耶杭固不得久淹兆文如兆文汲汲以去杭

為快則所以自任者亦異乎君子之道矣吾又知兆文
當欣然而往俛焉益懋其所有事道久而益信名久而
益彰可以任重道遠無疑也兆文還任將假道金陵拜
其兄南臺侍御君侍御君賢者也怡怡之際試出吾言
示之其必以為得切切惻惻之義乎

送四川按察司副使尹君奉勅鎮瀘序

瀘為川蜀南門其外皆剛夷惡獠難安而易動朝廷於
是特置按察副使一員加賜璽書俾之飭戎兵明法令

以控制其地環瀘千里皆在其掌握中蓋一方安危所寄也然必得廉重剛介達於人情物理者乃能使其人畏威懷德祇若王度以各有寧宇不然彼將肆無忌憚失禮而犯義或自相讐賊至紛結不可解紓而蜀以多事矣今年秋前奉璽書者他徙詔以刑部郎中尹君孔彰為四川按察副使往蒞其任君以進士官刑部凡十餘年精白一心威富兩訖聲實焯焯著於時會詔舉賢才少司寇屠公奏曰臣備員卿亞當舉堪任方面者竊

惟臣屬雲南清吏司郎中尹嘉言處繁劇之司而斷無
留獄秉固執之操而積有年勞臣竊以為於任方面無
忝及是命君子莫不以為宜余與君同鄉而君實先進
雅不余弱辱相與忘年蓋嘗語及立身行己之方君曰
所貴者始終一節爾有初無終厚自待者不為余竊謂
其言可以厲鄙夫敦偽俗充其志也其於任重而道遠
豈不綽綽然有餘裕哉於是卿大夫士之同鄉者屬余
言以為贈余聞先王之制詳內而略外聖人之訓悅近

以來遠蓋實德有以及人則風聲自然動物法設而不
用令出而不違而所謂戎兵者特為萬一之備而已其
或詳略失宜先後無序惟臨之以法劫之以威以求率
服之功未有能濟者也以君老成練達奚待余言蓋頌
不廢規斯贈言之體且令後來之頌君者將考信於余
言也君方便道還家獲拜尊兄宮保先生於澄江之上
惇友于之樂慰契濶之懷必有遠猷以贊長策區區常
譚將無以為覆瓿之用乎

送大尹蕭君之任江都序

國朝建官圖治於縣令之選最嚴非發身科貢兩途雖下縣不以輕畀凡自他途進者間有循資序稍入優品而卒不得為令豈不以令者百里之民命所寄必得通經學古之士然後知所以教養之方所謂君子學道則愛人也而縣令之中選自進士科者特蒙異視其褒揚登進恩典視舉人輩恒優又豈不以進士者天子之所親策拔其魁然傑然者於羣衆之中固將以大任付焉

非徒責其小成而已也夫以朝廷所以嚴縣令之選如此所以優進士之為令者又如此為令者宜何如其圖惟報稱也時俗所務在於謹送迎精簿書趣期會而於民之痛痒靡切於身俗之迷溺無改其舊嗚呼其無乃非朝廷所以嚴重優厚之意乎吾友蕭君以仁世其從祖太子少師尚約先生家學講明踐履之日久其為人純實豈弟有愛人之心由己未進士選為揚之江都令吾以江都之民庶幾蒙被君子之澤矣顧惟其地四通

八達賓客之往來者踵常相錯於途簿書期會之瑣瑣
未論也如以仁之存心將不屑乎時俗所務然而一送
一迎之失固足以速謗而招尤欲安其位以行其志得
乎夫天下固有事同而趣異者顧所用心何如耳吾欲
安於其位得行其志以澤乎民而非以要譽也則夫送
往迎來亦禮之所不容廢者而奚以不屑為哉大凡人
之才性必有所長苟非聖人寧無不足要在勉強而已
故曰勇猛剛強者戒於大暴仁愛溫良者戒於無斷湛

靜安舒者戒於後時廣心浩大者戒於遺忘賢如以仁
亦有當戒者乎誠不恃其所長務兼衆美以為用其不
至於大任者未之有也以仁之官鄉邑故事當有文字
為贈謂余職載筆不容以他讓余豈能文者哉姑以達
諸君之意而已

送大行人歐陽君序

天下之民有四士其一焉士亦民耳而獨貴於農工商
者命於天者厚修諸已者備也天之生此民也降衷惟

均然而往往擢孤秀於羣庸寓獨靈於衆塞故其知覺
特異器能亦殊而所業者有以極天下之精所任者有
以極天下之大其於耕稼之勞鄙賤之事非徒不屑亦
所不暇非徒不暇正亦不必親也夫在彼者皆我所不
為在我者皆彼所不能豈不有命存乎其間哉受天命
以為士然而自修之不力亦將無以異於蚩蚩者矣夫
禮以立其本義以達其用此士之所當自力者也故學
所以學此也仕所以行此也始於言行之常而極於神

化之妙時而達焉則彼三民者皆將賴我以生而不得不為吾役時而窮焉則美實之在我者固無損敬愛之得於人者亦無間也夫安得不貴乎今夫褒衣絳冠誦讀詩書操觚染翰而能為文字者世之所謂士也其名是矣夷考其行或有農工商所不為然方竊其名以進取下者得丞簿高者至公卿役天下之農工商以養其身以植其家而於此三民者曾靡絲毫之益其不為此三民所夷視者鮮矣名貴而實賤豈不大可羞哉豈不

有負於天之所厚也哉吾為此懼蓋常俛焉日有孳孳以從事於禮義而未能也有能從事於斯者固吾所樂交以求輔焉吾邑歐陽從龍英年美質學博而才充其存心制行皆自期於古人居常慨然有濟時澤物之念此真吾所樂交者既舉進士擢行人然局於其職不得有所施設茲者奉使遼瀋水行且萬里見聞之充拓諏謀之周咨其所得當自此益富異時所就其可量哉故於其行也相與極論為士之道以附贈言之義君方便

道過家省侍二親稱壽之暇試以余言為尊君太守先生誦之亦足以知君之取友有非善柔便佞者矣

贈僉憲姚君提學湖廣序

國朝學校之設在洪武初已大備其以提刑提學則始自正統間或副或僉初無常官惟上所命提刑主於推鞠選授之際率以其才提學主於化導非學有本原行可師法欲其振起羣士以進進於聖賢之學而收作人之功蓋亦難矣嗟夫庠序之士日呻其佔畢至於飽經

飫史著為文字粗有條理可觀輒悻悻自負以謂其學已至而孰知其未能無愧於聖賢之學邪蓋吾嘗試求之姑未論其遠且大者其孝弟忠信見稱於宗族鄉黨要亦未可多得至其所行與其所學常背而馳者則不幸屢有見焉其記誦雖多詞藻雖麗而根本固茫然矣見之於用果能有益於天下國家也耶天下之大非無豪傑然而待教以興者恒多方今振起之任賴有賢提學耳夫先其本後其末賢者之道固然於其本或不究

心未雖詳奚益此余於姚君秀夫之行所以不能已於言也君世家信之貴溪余嘗聞其先君子以經術發身累官陝西提刑僉事至君克世其業以顯而知其學為有原又嘗聞君治水浙西於水利十得七八在刑部尤以詳慎著名而知其學為有用舉進士垂二十年官始再轉歷官凡五考而先廬不益一椽於是又知其行為有恒也以其學行之懿如此其為羣士之表率也固宜故其擢憲僉提學湖廣知者皆曰是必能振起羣士以

進進於聖賢之學不徒以程試無失為能而已夫人相與稱君所能固在此而不在彼君茲往莅厥職能不究心於其本哉語曰可與言而不與之言失人余愚無識亦非能言者而意之所至有不能默矧重以程君廷臣楊君文淵之請於是乎言

送寶應縣丞李君序

丞與令均受百里之寄者也其位固有等差然為之苟得其道則民之父母之也一而已矣夫能使其民親之

如父母其聲實之美雖高官厚祿者亦或有所不逮孰有以其丞而輕視之者乎是知人之輕重不在於官而官之輕重實繫乎人也審矣故知道之君子未嘗苟慕乎外至其所以自任則不敢不力焉吾友李君廷模夙承家學厲志研鑽其經術明而行修謹以上舍生入選得揚之實應丞於其素所自許與朋友之所期待皆不負也而其言曰位之高下非我所能為丞之輕重在我所自致我其敢不勉圖祇適我祖以為吾丞重哉其言

如此是其學足以知道而勇於自任者也蓋廷模之大父信圭先生嘗為清河令以廉公豈弟協於其民秩滿擢知蘄州清河之民皇皇焉如赤子之失慈母耆老數百人相與走伏闕下乞以還當是時天下皆知李清河之為良吏也後先生超陞處州太守然未久遂卒故其名特著於清河至於今清河之老長猶稱頌不忘也使廷模一由先生之道以惠寶應之民廉而無欲也公而無私也豈弟而不為殘賊也則民之所以歸心廷模者

將何以異於清河之民之愛戴乃祖也哉夫得民心者
仁之功繩祖武者孝之實仁且孝君子之道備矣夫以
君子之道自任厚自待者也以君子之道望諸人待其
人之厚者也廷模誠厚自待吾詎敢待之以薄也乎故
因鄉郡諸君子屬贈言遂書此以申愛助之意

送武平掌教段君之任序

余家居績學時與蕭君時堅數往還相與下上其議論
志同嚮道同歸久而益孚皆自以為莫逆也既又因時

堅以交段君廷廣廷廣學優而識正文名勃勃為儕輩
所推而言動皆依於禮余益敬重其為人三人者時堅
最先領鄉薦廷廣視余稍後今年春余忝預禮部同考
官二君皆在試中皆治尚書正余所考者余意必得二
君寘諸高第以竊知人之名比填乙榜見廷廣名氏為
之惘然自失猶冀得時堅一人尚可少慰鄙心而時堅
竟亦不第余竊自咎以數十年相知之深而不能識拔
於一旦此則不明之過有不可掩者敢謂諸君得失有

命乎余既事寧家二君辱來過相勞苦如平日幾微怨
懟之意不見於色辭余方以失人為愧觀二君之所自
待與所以待余者又不能不為之喜然則余三人者之
相交豈苟然哉廷廣竟以例拘授汀之武平教諭今例
以乙榜司教者苟有成績不俟秩滿得再預禮部試則
余雖失廷廣當終為明主司所得夫何慊乎廷廣之行
時堅謂余宜有言贈顧余非能言者試舉尚書一二語
為廷廣申誦之舜命契曰敬敷五教在寬此萬世為教

者之則也穆王之命君牙則曰爾身克正罔敢弗正此
萬世為教者之本也身之克正敷教之克敬且寬焉而
人不相與化服以歸於中正而成其可用之材者未之
有也然舜之所謂寬本欲因其人之材質所宜不強其
所未及而優游以俟其化蓋不舍乎規矩自從容於規
矩之中豈如今之所謂寬者弛銜縱勒任其放逸自恣
遂至於為所不為也哉廷廣之先祖翰檢公嘗為太學
師學行表表可述今東平郡博廷舉於廷廣為從兄亦

能以師道自持嗣美聯芳在廷廣必無難者余尚有以
考其成焉

送福建左參政劉君之任序

國家承平日久文恬武嬉相安於無事一旦醜虜伺隙
侵擾西鄙邊臣失律遂致猖獗屬天象亦屢示警聖天
子赫然震動更用二三大臣以貞百度張皇威武命將
徂征屢勅有司繕塞垣峙芻粟務為經久之計于時更
張廢置幾務實繁每有大政輒令廷議吾友劉君子賢

以刑科都給事中與馬方其事端既發互相觀望莫肯折衷君正色昌言無所顧忌援引古義揆度時宜利害是非必窮極所見乃已而皆不謬於公論二三元老樂得其助益相與敬重之間有不合亦稱君為難得破淺謀而弘遠略飭內治而嚴外攘固本於皇上之克明大臣之能任而議論之益在君安可掩哉君起家進士擢兵科給事中即有名歷左右至都更踐四科于今十有五年矣以久次當遷遷福建左叅政叅政秩三品位高

而祿厚在省郎郡守極為美遷而人猶有為君不滿者
望實浮也然余以謂今之庶官在內莫要於臺諫在外
莫尊於藩臬要者其機足以弘濟尊者其勢得以專行
有弘濟之幾而重於顧忌有專行之勢而樂於因循是
皆容身保位之徒非有忠君愛國之實者也以君昔者
之居要其所表見已彰彰如此則今日之居尊將不大
有所建明哉世之樂因循者類以文法為解夫朝廷之
法雖密而所以潤澤乎其間者未嘗不付諸人苟一惟

文法是拘而無能潤澤則夫守文奉法夫人皆可又奚
必窮經學古出自高科者然後為足用哉君識敏而學
博氣充而才贍吾固知其將來所建明必有異於尋常
者矣余與君素辱愛厚有切磨之益於其行也義不容
無言然贈人以言其失有二以頌或失於諛以規或失
於激不諛不激余竊自謂庶幾知言如君不識以為然
乎否也

送長史范君詩序

昔賈誼以洛陽年少抱負奇才慨然有志於當世用吳公之薦獲事文帝屢有建明為絳灌之屬所抑出為長沙王太傅其用不究君子惜之然誼才高而量褊官既左遷恒鬱鬱不自得坐此促其天年使其能養之以和平克至於壽考安知不卒究其用也吾友范君廷和自弱冠遊鄉校即負才名既舉進士屬邊事孔棘遂慷慨上疏條陳利害方畧累千百言已而除翰林檢討以經術入侍涇王府開遷右長史或謂君所言事大臣有不

樂者故有是除余蓋不敢信其必然獨喜君樂居其職
無鬱鬱之意甯恭朝夕輔導有方綜攝府事無巨細皆
合權度收闊步而矩折斂逸氣以內充由是觀之誼之
才略固優而其識量視君或不逮矣君之為人不亦有
足尚哉夫建侯樹屏所以為宗社無窮計然宗社之固
其本在於得民心今日封建之制有國而無民雖不得
與之聚其所欲違其所惡第能勿擾之其為賜也亦已
厚矣萬一有擾之者豈惟吾民告病於宗社之本何如

哉此相之責也才如范君其必有以處此矣君茲以職
事侍王即封於沂與君同舉於鄉而胥會於都下者凡
十有一人相與醵餞於余侍御宗周之宅即席人賦一
詩以贈而速余為序余觀諸君之詩所以詠歌其才美
鋪張其職業而道離合之感寫縈繆之情者亦既備矣
余不佞念才美如君固吾同舉之光故復詳著於篇而
申之以得民心之說以冠於羣玉之首云

送蜀府長史李君序

國家以明德當天誕隆固命卜年卜世不啻周漢之長
而所以維不基綿令緒亦惟封建是賴蓋太祖之所經
理太宗之所損益宏規遠慮與周漢大約相同至於體
統之尊家法之正則有非漢所能及者是故受社啟封
千里承式展親秉德奕葉有聞振卓爾之風裕為善之
樂者豈直一河間東平而已哉於戲盛矣王國文武惟
百左右長史實惟大僚耳目股肱百責斯萃故其選授
之際恒慎而不輕也大抵不以應變成務為難而以正

身率物為貴夫身正則左右畢正率衆正以事君君其有不正乎一正其君厥邦時叙所以為王室重於此乎在矣於戲是其選也可不慎哉比屬府右長史員缺吏部請於上以南京國子學錄李君介夫補焉蓋慎選也自洪武肇封以迄於今建國之大僅數十而蜀最於天下有聞蜀有國且數傳矣今德承承而先獻王最有聞於天下以蜀之大先獻之賢繫觀聽之日不淺象賢保大在嗣王固克自盡而所以彌縫引翼以歸之正者非

相其誰賴哉介夫智足以燭幾敏足以適道其佐教國
子也以妙年著老成之稱遂達於當途以有茲擢夫國
有常度行其所無事則不愆心有同然動之以至誠則
丕應此率物之要成務之方相之所宜既厥心者也以
介夫之智且敏又何難焉余莅南雍方喜得介夫之助
不謂遽舍我而去也臨別惘然如有所失因其寮友諸
君子求言為贈遂不復以辭

贈按察僉事翁君之任廣西序

按察法官也法行於吏而廉平之政修焉法行於民而姦宄之徒戢焉其有裨於治不小也秩凡三等而權任惟均凡章疏文移皆得專達於朝廷直施於郡邑其勢之便任之專故法之行如風之靡草無敢不率其或有所不行非法之弊弊存其人焉耳然余獨念夫法有所不可盡者於翁君朝梁往僉廣西憲事試一言之廣之西重山複嶂林深而菁密谿洞隱曲綿亘數百千里多為犴獍之所盤據而編氓之逋逃者亦往往數焉蓋不

惟羣蠻之性好惡不常而編氓亦無定志好則來從惡則之蠻此法有所不可盡者一也其地去京師既遠郡邑所在大抵蕭條曷僻凡沿牒而至者非必皆德與才之選也彼其心固有所不樂矣第猶顧戀功名未忍決肆苟其惡不至於大為民病其能僅足以守乎官常固宜矜恤保持遂其長而略其短則亦無敢不勵苟繩以一切之法而小小出入或不能容以彼不樂之心將遂肆焉為一飽之營以決去計而所以病吾民者豈其微

哉此法有所不可盡者二也夫官以法名而法有不可盡者如此則將何以處之毋亦公恕之是務乎公以服吏民之心而嚴其在已恕以通吏民之情而盡其在人夫如是雖不盡法法固未嘗廢也將使良吏日多姦民日遠羣蠻聞風亦將革心而向化豈不為賢按察哉今之按察廣西者固皆通材偉器宜於吏民而吾翁君在大理日久體公行恕克既厥心亦既孚於上下今之往與其同官諸君子師師不急並流賢譽茲固可預占哉

大凡同官同年皆有切磋相成之義翁君之任也余固欲有言而侍御鄭君禹範秋官劉君仲賢何君廷佩又以贈言見屬誠不自知其不敏輒以是言於翁君君其將有合也

送太守高君之任九江序

兩京刑部並置十有三司廣東司所治俱稱繁劇非識之敏才之優為之鮮克以有聲也余來南京則聞刑部郎中高君肅正名君時莅廣東司凡司之由獄無不立

斷其操持克謹又善處寮友之際故名稱籍甚一時所
事大司寇烏程閔公浮梁戴公盱眙陳公皆時之鉅髦
而莫不禮重君且屬以通閱諸司奏牘奏上無弗允者
同官多推服以為不及今年夏以勞以望爰被推薦擢
知九江其同年友鄧君汝中輩喜其名位方進將益弘
厥施也相與徵余文送之昔唐陸倕由祠部員外郎出
刺歙州昌黎韓愈嘗送以詩而序其所以詩之意以為
陸君之道行乎朝廷則天下望其賜刺一州則專而不

能咸故其去也惜之者至於齋咨涕洟而不能已愚謂
昌黎是言直推重陸君云耳槩以近代官人之法要為
未盡夫天下之事惟宰輔得以行之臺諫得以言之外
此雖尊居卿佐猶各局於一職欲咸其澤於天下未可
得也而宰輔之位又豈郎官所得而驟躋哉夫登用賢
才固不當屑屑於資格然試功之審者乃所以養其望
而服天下之心而其人更歷既多則於運大濟艱將沛
然而無不利慘果賢士足勝大任一試以及民之功奚

不可哉如是而齎咨涕洟以為不當去蓋亦過矣今高君之賢視陸君未知孰先孰後然其出知九江僚友皆為之喜者以君才志得大郡而治之肅羣吏以阜蒸民運訐謨而迪嘉績美實茂著大任攸階則今日之專固異日之咸也夫安得而不喜哉抑慘之事功未有書於史冊其名垂至於今者直以昌黎之文耳余文不及昌黎未足以重君於天下後世要之史冊之光君必當有以自致以大慰僚友之望也夫

整菴存稿卷三

欽定四庫全書

整菴存稿卷四

明 羅欽順 撰

序 一十五首

送南京光祿卿楊公致仕還進賢序

弘治十六年春正月南京光祿寺卿進賢楊公以年滿七十馳疏乞致仕留司諸卿大夫士公評私議僉謂公雖老神識未衰其疏通果斷之才進當重寄猶當有以發揮於事業雖有請上且不俞已而竟得俞旨特命有

司給驛以還蓋異數也於是諸士大夫卿又相與言曰公固賢者能以禮自處朝廷處公以禮不賢公而若是乎公行有期其僚友豐城楊公率諸僚屬張筵以餞而屬欽順以言欽順與公令子刑部郎中二和為同年友比來南雍時進謁辱教愛良多雖不敏誼當叙公之所歸奉揚清風焯著高致俾夫人皆有欣羨感激之意以為公榮矧重以少卿公見屬乎夫士非無才之患也才而不失其正者為難非進而成功之難也功成身退

以全其令名之為貴宋當元祐之際才如鮮于子駿者
不少也至考其宜民之實則凡平日銳志功名以希進
取者曾不得與子駿班彼其所存者可知已公自舉進
士出宰丹徒擢監察御史歷陞至左布政使更踐福建
廣東浙江三方而在浙最久其為政適寬猛之中聲稱
熒然著聞中外浙之士民至於今頌其德美不忘一道
福星子駿固不得專美名於宋矣然則公之才豈巧於
進取者可例論哉漢黃霸為潁川太守薛宣為御史大

夫其功名風采震動一時之耳目後以為相而少貶焉甚矣全名之難得也公自布政遷卿光祿且無所見其才使進而任撫綏佐臺省固綽有餘裕然享有令名以去而使士夫君子有才不盡用之惜視黃薛所得不既多乎況有令子如吾二和年甫三旬官已躋於五品方來所至何可涯涘凡公所能為而未盡遂者其必能祇承懋績以底於盛此尤人所難得者而公豈必身親為之而後慊耶方壯而仕既老而歸尋往躅之釣遊訪平

生之耆舊相與從容燕飲為樂以休數十年塵埃鞅掌之勞竊以為一日之適雖三公不換也公其以欽順為知言哉

送光祿少卿楊君考績序

學不必優而仕仕優矣而於學無復庸心焉此士之通患也患之所自凡以內外之辨不明先名而後實苟明乎內外之辨知於其實汲汲焉其於學也有不容一日怠矣汲汲乎其實者由體以達用沂流而徂源始端其

趨終不謬其歸是故以之處則有以正其行而成其身
以之仕則有以發諸謀猷而措諸事業其用力也勞其
收功也速孜孜焉惟弗逮焉是懼夫安有止法哉豐城
楊君方震初舉江西鄉試第一已而登進士第改庶吉
士於翰林獲盡讀中秘書文學日益有名尋擢給事中
出入兩京前後幾年封事凡數十上其大者則屢勸
上勤御講筵求古帝王御世大經以施於治其他率繫
大臣之用舍時政之便宜邊鄙之利害其為說大抵明

切而不激委備而不迂坦然可舉而行讀其奏知其忠
且達也陞光祿少卿凡寺之宿弊佐其長疏剔幾盡其
為人動必由禮言簡而時當即之溫溫愈久而愈可親
於戲其可謂純明淵篤之君子也實則日勝而退然不
有其名慊慊然常若有所不足蓋公事之暇書卷未嘗
去手於性命微旨若治體所係尤足研究間形之著述
率於世教有關固將收功遠大而不自知其用力之勞
者歟君佐光祿三年當考績北上大光祿胡公合六科

諸君子暨凡光祿之屬為酒以餞之而以贈言見屬君
與余同出大江之西凡君交游皆當世聞人而余之迂
鄙狃隘幸亦不棄所愧者知君之弗盡耳既不獲卒辭
則姑述余所知以為胡公復有深於知君者其必不以
余為媚其鄉里交游也夫

送太宰林公考績詩後序

泉山先生林公以太宰統治南都既三載當以其績入
奏縉紳之士類有贈言此卷則舊嘗從公翰林者七人

相與分韻賦詩以為公贈者也少宗伯馬公既序其端
復俾欽順綴茲末簡狗尾之續祇以厚顏而義有不敢
辭者竊嘗觀之三載考績朝廷稽古立法固然然凡大
臣以滿考聞者第付之吏部磨勘其資力而已於所謂
績固未嘗深考也名為考績而顧弗深考豈以高明遂
從而略之耶蓋任大則體宏位高斯責重能否所繫誠
有在於簿書之外者凡平日之一言一行帝心簡在時
罔或遺必有考焉孰深於此故三載之考非大臣所以

輕重大臣所以輕重其必有道矣惟公德業之美見於
縉紳之所詠歌之所紀述者甚富欽順不佞莫能備舉
獨觀公在南都三載之間兩章繼上有人所難言者雖
一時不無少忤而聖明卒亮其忠世道轉移厥惟有賴
則公之績其待今茲入奏然後有可考見哉故夫以大
臣之道事君雖遠去朝廷而功未嘗不被於天下不以
大臣之道事君則雖日近清光月效成事而所務者亦
末矣此輕重之所以分也此公之所以重於天下也稽

天下之公以慰天下之望聖明允用斯道亦惟舊矣由
此占之公又終能遠去朝廷矣乎雖諸公之作詞不一
指其於茲義大抵互出而累見云

送太常少卿李公考績詩序

聖學黜計功之心王政嚴考績之法然則學與政其道
固不同耶愚不能無惑也蓋嘗聞之宇宙間事皆吾分
內而莫不有定理循其理而應之凡以盡吾職分之當
然而已夫豈容一毫計校之私耶然而理得則事成事

成則功於此乎在是雖無所期於先固自有以徵於後也王者立政分人以職而屬之事而屢省其成寧欲有加於分外耶亦惟觀其事理之得失何如以別其人之賢否云爾此聖學之與王政所以為合內外之道而君子之功所為異乎十禽之獲者與東崖李公初以進士第一人入翰林為修撰遷春坊諭德日侍皇太子講讀且兼經筵講官才名甚著俄以便養求外補遂拜南京太常少卿之命在太常三載考正典禮之失一二者

實既厥心雖忤人情而不恤曰我道蓋是也於是士夫
莫不服公之決而功名之譽歸焉然以愚觀之公高才
博學通知今古雖衆務紛錯往往談笑處之而莫不中
其會方當進當大任以究厥用區區儀文之損益曾足
為公譽哉茲以法當考績將遂北上南都鄉士有同翰
林之舊者情好素篤於其遠行不無睽違之感乃相與
醵餞於玉堂之署觴酌既屢復侑以詩詩以唐人雲間
金闕迴樹杪玉堂懸之句為韻賦者五人人得二字為

詩十首泉山林公官為吏部尚書東園鄭公由戶部侍郎進尚書致仕未行紫崖馬公官為禮部右侍郎楓山章公官為國子祭酒甯菴吳公官為翰林侍讀學士而適以微恙禁詩者吏部左侍郎碧川楊公拙不能詩而以羣公命為之序者國子司業泰和羅欽順也

送府丞張公還鄉序

士君子之仕止久速蓋有孔氏之家法存焉惟其可而已然或內輕而外重則惟有見於仕之可而於止之可

也無見焉夫有見於仕則不必可仕而仕矣無見於止則可止而不必止矣是故養廉遠恥之意少而偷合苟得之行多雖名為士鮮不得罪於聖人之門者若今南京刑部郎中張公之去殆有見於止之可也豈非賢哉公年未可以止而止以疾其疾猶可自力以供事而重於辰酉出遂決自止之謀會其子監察御史鳴鳳以職事入朝乃草乞休疏屬之戒令必上上則報可且進應天府丞以寵其歸今之自郎官擢府丞者百無一二

而公以求退乃沐殊寵是其退也未始不為進也夫進退之道仕止之宜豈可一言盡哉然自公今日觀之則彼支衰扶疾含垢蒙恥因循歲月以覲夫一資半級之遷用慊其所大欲而卒以不慊反貽玷毀者其於為人賢不肖何如也公先世累有聞人厥祖號雲林尤精理學傳公之父晚節至公遂以家學顯上貽晚節之封下衍御史之慶衣冠世美蔚為上海之名家公為人質直坦夷不尚苛刻自舉進士即為司寇屬於南都官三遷

績屢考皆最蓋將駸駸於大用而遽以疾中止縉紳之士莫不惜之然寵渥荐加金緋有煒又有御史君以為之子英年敏識才志傑然其進蓋未可量是猶秋冬之收斂而繼以春夏之發生也人之所以為公榮者其不又有在夫昔二疏之歸賜金雖多而名位無加於舊楊少尹之歸祿雖不絕而其子則未有聞以公觀乎古之人其所得果孰多而孰少也是必得如班孟堅韓退之之鉅筆以述其事然後可與夫三子者並傳而公之同

寅諸君子乃猥以屬諸不文如僕者其於公之高致盛
美安能使之焜耀於天下後世乎哉抑姑以贐公云爾

送何徽州序

國家肇建王業實根本於江南于時軍旅百需所取給
者不過數郡徽其一也其民蓋亦勞矣暨天下大定定
都金陵而諸郡皆為近輔聖祖念其民久勞於供億也
時賜租稅以休養之繼以列聖寬仁每加意於根本重
地於是江南諸郡以富庶稱天下可謂盛哉比年來中

外日多事其非時調發省符下四方者前後相仍雜以
富郡如徽亦駁駁入於凋瘵物不能以常盛固其數然
也然而撫摩愛護之以復於舊以遠覃聖祖之澤近宣
列聖之休非吾人之責其誰責哉當此之時舉其責而
付之人者宜不容苟而身其責者宜亦不敢以易視矣
吾於何君子敬之行而知徽之民其有賴焉君吾同年
友也有疏通之才而持之以慎有愷悌之德而行之以
果舉進士未幾才名已聞於當道遂擢御史莅南臺君

之為御史也內攝臺綱整整一時輿論推為老成由清
戎籍於吾大江之西寬不容奸猛不自遂其所經歷民
者少靡不安之吏常病於不能或能而未必良良足以
裕民而能足以成務有如君者以膺輔郡之寄及其民
之凋瘵未甚而為之悉心力以撫摩之俾生殖以時家
給人足內有以用其禮義之俗而外有以應乎公上之
求古所謂良二千石君固其選矣夫民猶樹也合抱之
樹百年培之而不足一日伐之而有餘如使樹之在山

常有培而無伐則其枝葉之峻茂所以庇蔭其本根者
不亦遠乎君之行也侍御馬君善徵張君某合同寅諸
君子張筵以餞而屬余以贈言余言固無取君無以為
飾牆壁之具則幸矣

送明府楊侯赴召序

吾泰和舊稱忠義邦其民多士雖不為士業亦往往通
章句能操筆記姓名其治生甚勤野無寸土之曠老長
旦暮相與教詔其子弟率在於孝弟忠信敦禮義尚廉

恥先公家之奉而後其私圖故其民至為易使雖使之
或非其道猶必謹於上下之分黽勉趨赴而不辭況乃
遇學道愛人之君子如今楊侯者以為之父母則其愛
戴慕悅有加而無已者豈非其心之誠然哉侯雲南鄧
川州人也以名進士被推擇而來持廉秉公始終一節
事無巨細處之務盡道理不苟以已意為高下嚴以行
恕簡以制煩日惟廂區之長數十人奔走承令於堂下
其餘則皆怡怡然早作暮息於村墟山谷間無非時非

事之擾民於是始知有父母之仁蓋六年於茲矣以侯之所存與其所以施於有政者雖莅岩邑御頑民猶將有以擾之而得其心服而況於吾邦乎然得吾邦人以為之使則其見効之難易遲速亦豈不有間哉侯茲以政績著聞榮膺風憲之召吾邦士民欲挽留而不得也其能言者咸相與作為文字以掄揚盛美而道其慕戀之私兩廂之長曾欽譚榮輩十有二人手一卷踵余門言曰侯之去慕戀者實多欽等尤不自勝也顧無以致

其情於吾侯願得先生一言余亦作得小詩一章將以
為侯餞未及而欽等至則復之曰余有言矣固自謂以
代興人之頌今為若等頌之詩曰六年江縣屹堅城羸
得窮櫺識太平文旆忽將秋色遠南山長對邑樓橫已
看學道光初服却喜遷喬得大行報國寸心知更苦眼
中人物定分明又略與釋其意云首云云侯治狀也旆
遠惜不留也山橫著不忘也初服之光吾與若等之所
以憐憐於今日也或請卒章之說余曰茲其義係於天

下姑置之言已十二人者立需於門顧余思蹇才疎其
何能遽有所作則姑述一時對答之語以致羣情於吾
侯侯其無以為草草時一展覽將亦不忘吾邦也哉

送助教鄒君致仕還臨川序

始余自翰林出貳南雍猥當攝行正事深惟寡薄弗勝
之懼所幸一時殷攷具備協恭夙夜用以粗飭條綱至
於士習之轉移則固未能無媿也今年秋大司成金華
章公始至公進退有道卓然古人既出而領袖諸儒士

類翕然感激駿駸有不變之勢則凡為之僚屬者宜益
單心畢慮紬繹其素學勤施於誨誘于以贊襄新化夾
就羣才用副聖天子惓惓振起儒文之意而助教鄒君
節明乃以此時引年決去母亦未之思耶雖然出處進
退士君子之大節也蓋有禮義存焉過者或矯以蒙譏
不及者類庸而可鄙節明起自辛卯舉人歷教蜀之達
邑浙之嘉興山右之太原二郡皆有明效陟助教於南
雍又三載矣雖其作人之志未始有怠而年則已及揆

之禮決之義而不敢渝焉其視溺焉而不知反者何如
哉而況使支屑屑焉較計失得於毫釐之間者聞之必
將有所警悟是亦所以為教也然則節明固已思之審
矣節明有子洛充邑庠弟子員嘗以見余其姿稟偉然
年富而志甚銳足以世其家學且聞節明嘗預菟裘之
營於其故居數里之近土田膏腴林泉清茂其歸也有
足樂者獨念余之寡薄方有賴乎淳篤老成如節明者
以為之助顧勉留而不得其何能無介於懷而大司成

公方謹責成寮屬之規有如節明之賢亦不能無歎然
於其去也於是羣僚合辭請言為贈公謂余宜有述乃
序其所以歸

送梧州太守李君之任序

正德三年春述職事竟監司郡守或黜或遷闕員凡數
十銓部擇所宜補位置有倫旬日間奏章連上或一上
而即允或再上而後諧蓋上意方嚮用老成其難也所
以示其慎也余同年進士分職南都于今僅二十一人

而遷者六山陰李德美自刑部郎中僉廣東憲事臨川
李希先自禮部郎中守梧晉江陳洪載自兵部郎中守
高戶部郎中太和王文瑞守台霸州曹本忠守臨江刑
部郎中仁和胡永清守廣之太平六人者歷年多而經
事熟固皆監司郡守之選而當嚮用老成之日同時受
命吾黨與有光焉雖或逾嶺而南稍為僻遠然君子居
之無弗宜也於是吾十有五人者僉為諸君贊喜相與
醵金以餞其行獻酬禮成樂飲無算清言善謔間以箴

規希先顧謂欽順曰何以贈我余曰廣東西列郡二十有一梧為中梧雖中郡而當兩廣之會有總鎮中貴人總兵將軍總督都憲三府在焉自兩藩文武大吏若二十郡以及其所統凡名有職位者不知其幾皆望梧而走以受三府之約束外之則深谿複洞連山密箐之中昏徭惡獍在在蟠結畜其狂獠而未敢盡肆者懼梧之不可度也此其地顧不重歟守之政令不出其封而郡之形勢實臨乎遠君茲拜命而往發揮素蘊以見諸施

設獨幾庶事舉封內又為無所負云乎哉梧之山川君
實主之使其山若增而高川若增而深隱然足以為一
方千數百里軍民之所倚賴茲固有任其責者而君亦
不容以出位為嫌也君在禮部時嘗侃侃論天下事人
固以為有奇節今攘鄰地比勢有相關切者孰謂不當
一置慮耶朝夕三府誠意積孚時出嘉猷以贊良畫則
君功名之美將出古循吏之上矣希先作而言曰子之
言贈我良厚惟不敏是懼豈其敢忘余乃顧侍者取卷

書之為送君之任序有言於一憲四守者亦各書於卷云

送太守曹君之任臨江序

士患無誠心愛民與其才之弗周才與誠合則時無不可為者蓋其通變宜民之慮常有以和調於法制之中截長補短以為功因高就下以為利日計雖不足而歲計則有餘矣彼工於徇時者必將曰時如是法如是吾民雖病吾且如之何哉於是切以整辦為心此其人

豈不足以致聲稱資進取然而厲民以自便君子之所
不由也余同年友霸州曹君本忠由南京戶部郎中擢
臨江太守臨江之士之仕於南京者素知君所以存心
所以行事皆相顧而喜曰吾民何幸得此慈父母哉凡
吾輩之知君者亦以為臨江之民之幸君之為郎戶部
也大要主於惜費而使民法在必行而不為刻深故人
畏而不怨嘗督京庾有蠹皆宿猾君廉得之軍一人
徙四人宿弊為之一清又嘗推舟淮安其稅兼輸錢鈔

數累鉅萬計有姦民囊橐其間輸者苦其邀求而司擁者多緣是獲謗弗之察也君首捕寘諸法舟往來者頌焉先皇帝末年嘗從南京戶部之請裁減冗食歲贏米二十二萬有奇其議蓋發於君于時羣小沸騰勢洶洶若不但已者君屹不為動曰茲吾職也敢弗盡乎君在戶部有年其行事蓋不止此然即此以觀可謂有愛民之心而周於才者也臨江之士其相顧而喜相語以為慈父母也宜哉夫愛民莫切於寬征此理之不易者而

寬征之說豈惟難行於今日識時務者亦難言之雖然
此說不行終歸於厲民而已其何有於愛況才之為用
正以濟夫時勢之難而副其心之所欲為者不然又何
貴於才美才如君其必有以處此矣昔人有言寬之一
分民受一分之賜況積以歲計其為賜也不亦多乎夫
然吾將見臨江之民莫不有以自給乃心愛戴真如赤
子之慕慈母而君之聲實茂著自將進於高位豈獨彼
工於徇時者之足以興哉抑臨江號稱大邦而蕩無城

郭有備無患茲亦愛民者之所宜留心況其利害又不止於一郡而已余鄰郡人也故因臨江諸君子屬言為贈既道其民之所欲而又贅及乎此蓋亦唇齒之過慮云

送助教符先生九載考績序

養士之法莫備於成周方其君道之昭明也師道亦有所繫而立是以人材衆而風俗美治化隆周既東遷教衰士散天下日以益亂紛紛籍籍以至於暴秦而君師

之道胥亡也久矣士之出於其時者可謂大不幸也更漢歷唐而宋而元上下千有餘年其間有志之君亦頗能留意於學校雖其立教無本其為法粗略而弗周然而師道往往賴之以行是以先王之道不終墜於地我太祖高皇帝天縱聖德受天明命以為天下主尤以學校之教為急務之先首建國子學於京師遂推之以達於天下雖偏州下邑窮邊絕徼莫不有學其授業也有師其代耕也有廩教養之法視前代詳矣而於國子學

允詳蓋凡宮室之經營制度之品節成德達才之要飲食器用之微裁自聖心無不曲盡復深懲近代之失以爲敗倫傷化鮮不自懦師悖徒故所以訓飭師儒者必欲其嚴以立教有不率教者往往屏之遠方甚或處以重典肆爲教者有所恃而舉其職游歌者有所畏而不敢爲百餘年來人材風化可以遠追成周之盛者有由然也雖然師道有所恃而立固爲斯文之幸而吾黨之居其職者苟非有以自立亦安能無愧於心乎學至於

自立甚難而行則不可不勉勉乎行者務重乎內內之
重者其外必輕吾嘗以是而求之於吾助教符先生蓋
在所取也先生行恪而和言簡而當儀度修整而講說
詳明士子從其游者皆自以為得師而人之知之者蓋
鮮夫嗟卑厭冷常情之所同人不已知君子之所不病
先生自蒲州學正陞助教於南雍於茲九年矣兩監師
儒歷任三五年者率遷他職以去而先生久於其職自
守益堅今其獻績於朝也妻孥弗移舍館如故意若將

終身焉所謂重內而輕外者非耶夫重內輕外之士豈
惟可以為教亦優於為政也如建之民上吾固知其必
將後已而先民當道者或以是處先生豈不為得人乎
然使吾失一賢佐而力弗能留吾將不能無私怨也先
生之行其僚友合詞請余言為贈余與先生皆出大江
之西而學正郭先生又以同鄉之好申請至再三不倦
誼有不得辭者於是乎言

送少參張君之任湖藩序

天人之相勝吾嘗聞其語矣然不免於二之夫天固不外乎人也是故推其數殆不可勝窮循其理則不容少易凡人之所為即天之所以在也是故人事得而天降康人事失而天降亂非相勝也乃相應也雖其窮極之際轉移之機若有莫之為而為者然亦未始不因乎人故君子之仕也小而一邑一郡大而一方又大而天下苟其責任在已必惓惓焉惟治安是圖以為斯民立命一有敗證固將反躬自責而勉圖後効其敢諉諸天數謂

吾力不能勝乎頃年以來中外亦多事矣余方從事農圃天乎人乎所不敢知頗聞湖藩水旱荐臻盜賊羣起軍民憔悴之態談者至不忍究言反覆以思恐未可謂之適然也虐政召災貪風鼓盜人事之失殆非一朝以貽其患於今日不有君子誰其拯之太庾張君天衢舉已未進士第出宰揭陽休寧兩邑皆有聲入為給事中於南京禮科端雅周詳務持大體蓋君子人也茲有湖藩少參之擢湖之民其有賴哉夫琴瑟不調其絃在所

當改前車既覆其轍不容復循推所以致弊之由而救
弊之方明於指掌本諸身以嚴乎吏宣上德以下於民
通融其有無宣暢其湮鬱洗滌其瑕疵夫是之謂改絃
易轍人事既盡湖湘漢沔之區其有不清矣乎以吾張
君之賢用當是時不肯泄泄於其間也審矣余嘗得休
寧人士所刊去思錄一帙讀之見君遺愛之深足以不
朽顧其所及者猶狹孟子曰廣土衆民君子欲之今君
位進參藩澤可遠施苟此心不懈異日以豐功偉績去

陟巖廊將湖人之思不有百倍於休寧者乎君行余不
及餞黃門胡君斯靖劉君景瞻謂余素善君宜有言曰
亦同鄉諸君子之意也夫言既及之誼不容隱張君宜
有合矣得無有病余言者乎

送福建少參鄭君之任序

今布政司即古牧伯之任也書紀帝舜咨牧之辭曰食
哉惟時柔遠能邇惇德允元而難任人成王志切阜民
首令六卿分職以倡九牧而詩韓奕之篇有曰因以其

伯實墉實壑實畝實籍獻其貔皮赤豹黃羆是知重民
食一遐邇親君子遠小人修城池治田畝正稅法貢土
物皆收伯之所有事也修此數事以和六卿於外天下
之治其有不成矣乎我朝以布政名官加繁承宣字於
其署其官之長曰使其佐曰參政參議其職任無異於
古可知也然而中外同心倡和以義則民莫不蒙其休
中外異心倡和以利則民莫不蒙其咎詩云民亦勞止
汔可小康當此之時固將出遺黎於塗炭而濯之以清

風引匹羸之氣於一線之微而滋息之以復乎膚革充盈之舊為民牧者容不盡其心乎余友鄭君立之夙慧不凡而充之以博學明乎陰陽之變達於人情物理之紀以進士為郎南京兵部歷職方車駕武選三司自守嚴臨事敏差遣舉措動合人心雖權貴無能以其私撓之者當道雅知其賢遂奏為福建布政司右參議士夫之論皆謂其必能盡心民事無疑君世居上饒之葛源直江閩之界尊府君雅有高行嘗被職方主事之封與

其配安人偕老無恙君喜過家道便計日將拜慶于庭
其行孔亟諸謀以言贈者未之達也會余起廢後莅南
雍侍御徐君子謙夏官歐陽君相周乃來屬筆余與君
交厚其曷辭蓋君子雖無所不用其心然必審乎先後
緩急之序先後緩急之序不失是則所謂義也率義以
從事始於民食之足而終於職貢之修俾承我者之心
皆與我同而不同者不容一日幸居其位夫如是則其
成功也何有哉功茂成於一方道且行於天下吾黨屬

望惟在此余以是忘其不敏而著之于篇

贈侍御楊君奏績序

士有志於功業者必以守身為本其身一失則萬事瓦
裂雖有絕倫之智高世之才尚安用乎頃年以來中外
士夫往往不幸而壞於賊瑾而關陝為甚蓋瑾陝產也
瑾善盜官以啗其鄉人用為腹心股肱耳目受其啗者
恬不思義方揚揚自慶以謂天下事無不可為然而智
未及謀才未及展一反掌而已俱敗曾其身之無所措

尚何功業之云當此之時其凜然自守超然遠迹不為其所污者亦有之矣以余所知得二人焉監察御史楊君德徵翰林修撰呂君仲木皆出自關陝者也余去翰林也久呂君之賢蓋得之一二舊寮友間楊君則余嘗往還其寮友周君誨可許君舜咨間為余言之尤悉語云歲寒然後知松栢之後凋也何幸於二君見之充其志也德由此而立矣况功業乎楊君初領鄉薦再上春官以乙榜例拘去為內鄉教諭陞教東昌保定凡十有

五年七膺薦剡乃陞今職莅山東道於南京君教人先德行而後文藝尤善啟發至如冠婚喪祭飲射諸禮皆稽諸古歷歷舉行於生徒有恩贈遺雖微一不受一時師儒中不多得也及為御史論事持法未嘗有所遷就嘗清理諸輔郡戎籍又領都城徼巡之寄又經理諸輔郡屯田推究施張規模整整凡其寮友莫不推重以為能孟子曰人有不為也而後可以有為其不信夫今以考績入朝當公道大明之時而君卓然有已試之功皎

然有不污之節儉華陟要其誰曰不宜名位日隆其建
立當益偉茂著忠貞之績昭垂竹帛之名以稱為關陝
第一流人物不於君有望哉君之行也周許二君舉臺
中故事來以贈言見屬余不佞蓋嘗聞古人有初節晚
節之說君自茲以往宜必有光於其初

贈封諭德西園豐公還四明序

凡山水之經遠者百里不皆峰十里不皆瀾也峻極之
餘必有堂焉急湍之下必有潭焉曼衍紆徐潄泓淵瀨

蓄其所以經遠之勢而再發之是故其為峰也益奇其
為瀾也往往極天下之文而莫之能狀茲理之在地也
固天然也而在人則亦有然者矣以余觀乎四明豐氏
若今封諭德西園先生豈不能為峰為瀾也哉然而名
逸於賢書官止於宮教衍而弗峙渟而弗流人或以是
而致疑於天而不知夫天固以蓄豐氏經遠之勢也豐
為四明著姓若清敏公之在宋最為有聞在國朝則自
先生尊人以及先生及其嗣子凡三世顯矣尊人起家

進士累官河南右布政使其功名利澤殆與嵩洛相為
雄深先生有諸中者實克似之而名位曾莫之副然於
義方之教則專矣由是嗣子熙原學一旦以諸生入奉
大對遂取先多士拜官內翰再遷春坊諭德簡在院事
于南京其望日益隆而文日益盛泰山之仰江漢之方
將有不期而自合者蓋其資稟固異而增高益深有得
於義方者又非一朝一夕之功然則謂大以先生蓄豐
氏經遠之勢其不信耶先生好古而惇禮初為訓導湖

口以奉母夫人之養棄而歸後以教授侍建安王會常
得編修之封遂辭去原學屢以迎養請輒欣然而至然
所至不肯久留蓋其高尚如此其學於經史百氏無不
覽而於地理尤深然則自識者觀之亦何嘗不以為峰
為瀾也茲者將自金陵東歸其鄉之彥監察御史顧君
輩來以贈言見屬余嘗辱先生不鄙相與論金陵形勢
良有合因有取於山水以為先生父子況焉

整菴存稿卷四